

Kalaallit Nunaannut suliffissarsiortarneq pillugu Inatsisartut inatsisaata allanngortinneqarnera pillugu Inatsisartut inatsisaattut siunnersuummik saqqummiussinissamik Naalakkersuisut peqquneqarnissaannik Inatsisartut aalajangiiffisassaattut siunnersuut. Inatsisissatut siunnersuut nunatsinnut nuuttut kalaallit kulturiannik, oqaasiinik naleqartitaannillu ilinniarnissamut piumasaqaatitalimmik periarfissinneqarnissaannik aalajangersaassaaq. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq. Inatsisissamik piareersaasiarluni suliaqarnerup peqatigisaanik, Kalaallit Nunaanni inuiaqatigiinnut akuusitsilersitsinissamik inatsimmik atulersitsinissaq pillugu Naalagaaffeqatigiinni oqartussaasunut Naalakkersuisut saaffiginnissuteqassapput. (Inatsisartunut ilaasorta, Kristian Jeremiassen, Inuit Ataqatigiit)

Akissuteqaat

(Isumaginninnermut, Ilaqutariinnermut, Suliffeqarnermut Nunamullu Namminermt Naalakkersuisoq)

Aappassaanneerera

Kalaallit Nunaannut akuutitsinnermut suliaasaqarfik pillugu oqallinnissamut ulloq 5. september 2023-mi danskit nunani allamiunut akuutitsinnermullu ministeriat Naalakkersuisut qaaqquvaat, suliaasaqarfimmi inatsisitigut aqutsinerup amigaataanera pissutigalugu.

Akuutitsinnermut suliaasaqarfimmik aqutsinissaq siunertaralugu aaqqiissutissanik nassaarnissaq pillugu suleqatigiinnissamut danskit nunani allamiunut akuutitsinnermullu ministeriat isumaqatigiissuteqarfigineqarpoq, tassunga ilanngullugit Kalaallit Nunaannut akuutitsineq pillugu inatsisiliornissaq kiisalu sulisussanut avataaneersunut oqaatsinik aamma kulturimik ilinniartitsineq pillugu inatsisiliornissaq.

Suleqatigiissitap suliaasaanut piffissamik pilersaarusiortoqanngilaq, kisianni Naalakkersuisunut aamma nunani allamiunut akuutitsinnermullu ministerimut suliaasaqarfiuvoq salliutinneqartoq.

Inuussutissarsiornermut Aatsitassanullu Ataatsimiititaliaq tamanna pillugu ataatsimiinnermi ulloq 18. september 2023-mi ilisimatinneqarpoq.

Taamaalilluni akuutitsinnermut suliaasaqarfimmi inatsisitigut aqutsinnermut amigaataasumut aaqqiissutissamik nassaarnissaq pillugu danskit nunani allamiunut akuutitsinnermullu ministeriannik isumaqatigiissuteqarnerup immikkoortoq 61, maannakkut suliarisarput kalluarpa.

Akuutitsinnermut suliaasaqarfimmi marloqiusamik aqutsineq aamma inatsisinik allannginerit naleqqutinngitsut pinngitsoortinniarlugit Naalakkersuisut allannguutissatut siunnersuummik maannakkut saqqummiussipput, ima oqaasertaqartoq:

Akuutitsinnermut suliaasaqarfimmi inatsisitigut killiliussanut tunngatillugu kingusinnerpaamik UPA2025-mi siunnersuummik saqqummiusseqqullugit Naalakkersuisut peqquneqassasut Inatsisartut aalajangiiffisassaattut siunnersuut. Danskit oqartussaasuunik suleqatigiinneq aallaavigalugu aaqqiissutissaq sorleq

malillugu suliap nanginneqarnissaa pillugu Naalackersuisunit isummerfigineqareerpat siunnersuut saqqummiunneqassaaq. Danskít oqartussaasuinit suleqatigiinneq imaluunniit Folketingimi inatsisiliornerup ingerlanera pissutigalugu Naalackersuisut kingusinnerpaamik UPA2025-mut siunnersuummik saqqummiussingippata, Naalackersuisut Inatsisartuni ataatsimiititaliaq attuumassuteqartoq saqqummiussinissamut amigaataasumut suna pissutaanersoq pillugu ilisimatitsissapput.

Taamatut oqaaseqarlutik Naalackersuisut immikkoortoq Inatsisartunut suliassanngorlugu tunniuppaat oqallilluartoqarnissanillu kissaateqarlutik.